

समे – 12:25

<><><><><><>

PM Campaigning

भारती जनता पार्टी दे नेता ते प्रधानमंत्री नरेन्द्र मोदी होर अज्ज संजा गोवा दे वास्को च इक चुनावी रैली गी संबोधत करगंन। ओह महाराष्ट्र दे कोल्हापुर शैहर च बी इक जन सभा गी संबोधत करगंन। अगले म्हीने दी 7 तरीक गी गोवा दी 2 ते महाराष्ट्र दी 11 लोकसभा सीटें लेई त्रिए गेड़ तैहत वोट पाए जांगन। तोआई कांग्रेस दिया महा सचिव प्रियंका गांधी होर बी पार्टी मेदवार दे समर्थन च लातुर जिले च चुनानी रैली गी संबोधत करगंन। बीजेपी दे वरिष्ठ नेता अमित शाह ते कांग्रेस दी महासचिव प्रियंका गांधी होर अज्ज गुजरात च बी अपनी-अपनी पार्टी दे मेदवार दे समर्थन च चुनावी रैलिंग गी संबोधत करगंन। गुजरात च 7 मई गी वोट पोआए जांगन।

<><><><><><>

JK Election

जम्मू कश्मीर च बी कल 18मीं लोकसभा चुनाएं दे दुए गेड़ तैहत वोट पाए गे। चुनाव प्रक्रिया पूरी रमानदारी कन्नै मुकम्मल होए। आकाशवाणी दे जम्मू संवाददाता होरें जानकारी दित्ती जे बड़ी मती गर्मी दे बावजूद बी लोकें च ते चेचा करी पैहली बारी वोट पाने आले नोजवानें च वोट पाने लेई बड़ा मता चाह दिक्खेआ जा'रदा हा। लम्मी लम्मी रीहगें च लग्गे दे लोक बड़े मते उत्साह कन्नै अपनी बारी दा इंतजार करदे लब्भै। जम्मू, सांबा, रियासी ते राजौरी दे इक जिले च कल 71.91 फीसद मतदान दर्ज कीता गेआ।

<><><><><><>

Dr. Jatinder Singh

केन्द्री मंत्री डॉ. जितेन्द्र सिंह होरें कल गलाया ऐ जे लोकतंत्र सेई मायने च प्रधानमंत्री नरेन्द्र मोदी हुंदी अगुवाई च गै बधेआ-फुल्लेआ ऐ। उनें गलाया जे पिछले 10एं ब'रें दरान देश नै असली बदलाव दिक्खे न।

उनें गलाया जे जम्मू कश्मीर थमां दफा-370 हटने मगरा जम्मू कश्मीर च विकास दी नमीं लैहजर आई ऐ ते एह सब्ब प्रधानमंत्री हुंदी अगुवाई च गै मुकम्मल होआ ऐ। तोआई इक मीडिया चैनल गी दित्ते दे इक इंटरव्यू च डॉ. सिंह होरें पत्रकारिता दे अपने शुरूआती दिनें गी ते रेडियो ते थेटर च कीते दे अपने कम्मों गी चेता कीता।

<><><><><><>

J&K Sopore Encounter

जम्मू कश्मीर च उत्तरी कश्मीर दे बारामुला जिले चे सोपोर दे नौपाड़ा इलाके च सुरक्षा बलें कन्नै छिड़े दे इक टाकरे च दऊं आतंकवादी मारे गे न। मारे गेदे आतंकवादिणं दे कब्जे चा थेआर ते गोला बरूद बरामद कीता गेआ ऐ। एहदे शा पैहले वीरवारें आतंकवादिणं दी मजूदगी बारे इक सूह थहोने पर कारवाई करदे होई जम्मू कश्मीर पुलस, फौज ते सीआरपीएफ दी सांझी टीम नै इलाके गी घेरियै तुपाई अभियान चलाया हा जेहदे बाद कल दिने आतंकवादिणं आस्सेआ फाइरिंग दे बाद टाकरा भखी गेआ ते सुरक्षाबलें गी दौनें आतंकवादिणं गी मारी मकाने च कामयाबी हासल होई।

<><><><><><>

Kishtwar Earthquake

किश्तवाड़ च कल रातीं 11 बज्जियै 6 मिंटे उप्पर 3.5 दी तीव्रता आले भूंचाल दे झटके मसू कीते गे न।

<><><><><><>

Ramban DC

रामबन दे डिप्टी कमीशनर बसीर-उल-हक चौधरी होरें कल गूल दे परनोट ग्रां दा दौरा लाइयै उत्थें जिमीं थस्सने करी घरें गी पुज्जे दे नुक्सान दा जायजा लैता। आकाशवाणी दे रामबन संवाददाता दी रिपोर्ट मूजब प्रभावत इलाके च बने दे 50 मकानें चा 30एं गी नुक्सान पुज्जे दा ऐ ते इस क्रोपी दी मारै हेठ आए दे परोआरें गी सुरक्षत थाहरें पर भेजी दित्ता गेदा ऐ। डिप्टी कमीशनर होरें राहत सरबंधी मामले गी तेजिया कन्नै तोड़ चाढ़ने मे प्रभावत परोआरें गी मदाद पजाने दे निर्देश जारी कीते।

उनें मकामी लोकें गी जकीन दोआया जे धरते सरबंधी विज्ञान आले मैहकमे थमां माहिरे-विशेषज्ञे दी इक टीम उंदे इलाकें दा दौरा लाइयै उत्थे जिमीं घस्सने दिएं वजहें दा पता लाग। परनोट च रामबन-गूल शिड़क बंद होने दे बावजूद जिला प्रशासन नै हौली मोटर गडिडएं लेई सुम्बर-डिगडोल राबता शिड़क गी खोले दा ऐ तां जे सब-डिवीजन गूल तोड़ी जरूरी ते एमरजेसी सप्लाई पजाई जाई सकै।

<><><><><><>

Chairman Tribal

जम्मू कश्मीर दे साबका मुखमंत्रि उमर अब्दुल्ला ते महबूबा मुफ्ती हारे चुनां आयोग गी अपील कीती ऐ जे ओह खराब मौसम दे चलदे अनंतनाग-राजौरी लोकसभा सीट उप्पर 7 मई गी होने आले चुनां गी अगड़ा नेई पान। तोआई जनजातिय कल्याण समाज दे प्रधान प्रो. एम.के.वकार हारे बी चुनां आयोग गी जोर देइयै गलाया ऐ जे ओह चुनां गी अगड़ा नेई पान की जे जनजातीय समाज अपने वोट पाने दा अधिकार दा इस्तेमाल नेई करी सकगन। की जे जनजातीय वर्ग दे लोकें इसलै उच्चिएं थाहरे आली बक्खी बधना होंदा ऐ ते ओह इस कम्म च पैहले गै देरी करी चुके दे न। उनें चुनां आयोग गी तैह समे उप्पर गै चुनां कराने दी अपील कीती।

<><><><><><>

IAF

भारती वायु सेना नै डिजीटल इंडिया कार्यक्रम दे अंतगर्त प्रमुख च दस्तावेजे गी सुरक्षत ते आसान इस्तेमाल लेई डिजी लॉकर प्लेटफार्म दे कन्ने जोड़ेआ गेआ ऐ। नमीं दिल्ली च वायु सेना मुख्यालय वायु भवन च अज्ज इलैक्ट्रनिक ते सूचना प्रौद्योगिकी मंत्रालय दे कन्ने वायु सेना नै डिजी लॉकर दे सुरक्षत ते सुलभ दस्तावेज भंडारण सेवा समझौता ज्ञापन पर दस्तखत कीते। रक्षा मंत्रालय नै आक्खेआ ऐ जे एहदे कन्ने नौकरी करा'रदे ते रटैर वायु सेना कर्मिएं दे महत्वपूर्ण दस्तावेजे दे रक्ख-रखाव च क्रांतिकारी बदलाव औग।

मंत्रालय नै आक्खेआ जे भारतीय वायु सेना दे अधिकार तैहत विभाग ते डिजीजन हुन सुरक्षत दस्तावेज भंडारण ते असानी कन्नै रखे जाने आले डिजीटल रिकार्ड, प्रमाण पत्र ते महत्वपूर्ण दस्तावेज राश्ट्री डिजी लॉकर रिपोसीटरी च बगैर कुसै रूकावट दे अपलोड करी सकगंन।

<><><><><><>

Archery World Cup

शंघाई च चला'रदे तीरंदाजी विश्व कप च भारत दी ज्योति सुरेखा बेन्नम, अदिती गोपीचंद स्वामी ते परनीत कौर नै कंपाउंड मिक्स्ड फाइनल च इटली गी हराइयै शानदार जित्त हासल करी लैती ऐ।

<><><><><><>

IPL

आईपीएल क्रिकेट च कल रातीं कोलकाता च खेड्डे गेदे इक शानदार मकाबले च पंजाब किंग्स नै कोलकाता नाईट राईडर्स गी 8एं विकटें कन्नै हराई दित्ता। पैहले बल्लेबाजी करदे होई कोलकाता नै 20एं ओवरें च 6 विकटें दे नुक्सान पर 261 रंज बनाए। जेह्दे परते च पंजाब दी टीम नै 18 ओवर 4 गेंदें च पंजाब दी टीम नै दऊं विकटां मोआइयै 262 रंज दा लक्ष्य हासल करी लैता। आईपीएल क्रिकेट च अज्ज दऊं मैच खेड्डे जांगन। पैहला मैच दिल्ली च दिल्ली कैपिटल्स ते मुंबई इंडियन्स बश्कार साढे 3 बजे शुरू होग जिसलै जे दूआ मैच संजा साढे 7 बजे लखनऊ च खेड्डेआ जाग

<><><><><><>